

Izjava OHR-a na konferenciji za medije međunarodnih organizacija

Visoki predstavnik ne prihvata dalja odlaganja

Visoki predstavnik Paddy Ashdown je danas poslao pismo predsjedavajućem Vijeća ministara gospodinu Adnanu Terziću, apelirajući da Vijeće ministara, bez odlaganja, stavi u parlamentarnu proceduru Nacrt zakona o obavještajno-sigurnosnoj agenciji.

Prošlo je više od dva mjeseca od kada je Komisija za reformu obavještajnog sektora, predvođena mađarskim stručnjakom iz ove oblasti gospodinom Kalmanom Kocsisem, predočila nacrt zakona Vijeću ministara. Depolitizirana agencija pod demokratskom parlamentarnom kontrolom trebala bi početi sa radom 1. januara 2004. godine, ali zbog politički vođenih izmjena i dopuna Zakona, Bosna i Hercegovina ne može pokazati spremnost da se priključi Evropi u borbi protiv međunarodnog terorizma, organizovanog kriminala i trgovine ljudima.

Visoki predstavnik vjeruje da sigurnost mora biti glavna tačka na dnevnom redu BiH. BiH mora pokazati novu ozbiljnost u vezi sigurnosnih pitanja, i prvi test te nove ozbiljnosti je Zakon o obavještajno-sigurnosnoj agenciji. Visoki predstavnik je rekao gospodinu Terziću "da ako Vijeće ministara ne može proslijediti Zakon parlamentu do 15. decembra, to će biti zabrinjavajuća poruka o radu Vijeća ministara i njihove spremnosti da se ozbiljno pozabave sigurnošću države". Već se dovoljno odugovlačilo, te dalja odlaganja mogu podrivati u sigurnost ove zemlje, kao i njenu međunarodnu reputaciju da uzima za ozbiljno pitanje državne sigurnosti.

Također, on je pozvao Vijeće ministara da oforme radnu grupu

koja će raditi sa međunarodnom zajednicom na praktičnim elementima oko uspostave agencije, uključujući i nadgledanje praktičnih dogovora oko prenosa odgovornosti, osoblja i imovine postojećih obavještajnih službi novoj obavještajnoj agenciji što prije nakon usvajanja zakona.

Svako dalje odgađanje će ozbiljno ugroziti naše šanse da imamo novu službu u potpunosti operativnu na početku Nove godine. "Takav neuspjeh bi služio kao potvrda međunarodnoj zajednici da BiH nema institucionalnih kapaciteta za euro-atlantske integracije niti za borbu protiv terorizma,"navedeno je u pismu visokog predstavnika.

Visoki predstavnik će prezentirati osnove Programa rada za 2004. godinu

Visoki predstavnik Paddy Ashdown će se sutra obratiti na konferenciji koju organizira BiH Ministarstvo inostranih poslova i Fondacija Friedrich Ebert Stiftung pod nazivom «Put u Evropu – sljedeći koraci».

Visoki predstavnik će pojasniti da Bosna i Hercegovina sada ima priliku da se odlučno pomakne iz poslijeratne ere u eru pred prijem u Evropu – iz Daytonске ere u Briselsku eru. Šesnaest prekretnica obilježavaju put od jedne ere ka drugoj; šesnaest zahtjeva koje je izložila Evropska unija prošlog mjeseca. Evropska unija i NATO su pokazali da su ozbiljni po pitanju BiH kao potencijalnog člana; BiH ispred sebe ima šest mjeseci da pokaže ozbiljnost da postane njihov član. NATO će se sastati u junu u Istanbulu kako bi razmotrili napredak BiH; Evropska komisija će krajem juna razmatrati da li je BiH spremna započeti pregovore za Sporazum o stabilizaciji i pridruživanju. Evropa je pružila ruku BiH; BiH se sada mora mašiti posla i zgrabiti priliku.

Visoki predstavnik će govoriti o važnosti uspjeha BiH na ovom putu, što će biti pokretačka snaga ne samo za njegovo djelovanje i fokusiranje, nego i za djelovanje vlada na

državnom i entitetskom nivou; BiH si ne može priuštiti da joj takva prilika promakne.

Forum će početi sutra, 3. decembra 2003. godine u 11.00 sati, u amfiteatru UNITIC poslovnog centra, a visoki predstavnik će održati govor između 11.15 i 12.00 sati. Novinari će moći prisustvovati cijelom forumu, te postavljati pitanja između 12.00 i 12.30 sati. Za dodatne informacije kontaktirajte BiH Ministarstvo inostranih poslova i Fondaciju Friedrich Ebert Stiftung.